



mjesečni Bilten



avgust
kolovoz
2025

omladinska mreža bosne i hercegovine
ISSN 2831 - 0845

315

Dragi prijatelji/ce,

Predstavljamo vam **avgustovsko** izdanje (broj **315**) mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine.

Bilten izlazi na bosanskom-crnogorsko-hrvatsko-srpskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.orctuzla.ba



S A D R Ź A J

Aktivnosti u avgustu.....	2
Planovi za septembar.....	5
Aktivnosti članova mreže.....	6
Saopštenja/informacije/donatori/pozivi.....	14

Uživajte u čitanju!

AKTIVNOSTI ORC/HCA U AVGUSTU



U Tuzli održan trening Forum teatra



U Tuzli je 11. i 12. augusta 2025. godine održan trening **Forum teatra** – jedinstvenog alata koji nije rezervisan samo za glumce, već za sve one koji žele graditi mir, zajedništvo i pravednije društvo. Ovo je bio drugi trening u okviru projekta **“Gen Z Rising: Millennials Supporting”**.

Forum teatar je prepoznat kao savremeni alat za izgradnju mira, kroz koji učesnici uče kako reagovati na probleme u društvu i pokrenuti dijalog. Mladi su imali priliku da kroz umjetnost adresiraju teme poput diskriminacije, nasilja i društvene nepravde, te da razvijaju vještine važne za rad s ljudima, komunikaciju, liderstvo i javni nastup.

Trening je okupio mlade od 15 do 30 godina iz cijele BiH. Najposvećeniji među učesnicima nastavili su svoj put izgradnje mira i boljeg društva kroz naredne aktivnosti projekta.

Trening **“Forum Teatar”** realizovan je uz podršku projekta **„Jačanje povjerenja i kohezije u zajednicama u Bosni i Hercegovini – Možemo Bolje”**, koji finansira

Služba za instrumente vanjske politike Evropske unije u okviru Instrumenta za susjedstvo, razvoj i međunarodnu saradnju, a zajedno provode Evropska unija, Ujedinjene nacije u BiH, Misija OSCE-a u Bosni i Hercegovini i Vijeće Europe.





Europe House kviz u Živinicama

Omladinski resursni centar Tuzla u saradnji sa **Europe House** organizovao je 19. avgusta u Živinicama zabavni i interaktivni kviz posvećen istraživanju historije Evropske unije, njenih politika, kulture, sporta, muzike i znamenitosti.

Prvo mjesto na ovom takmičenju osvojio je tim **“Kafica”**, koji se istakao znanjem i timskim radom.

Kviz je okupio mlade iz različitih gradova Bosne i Hercegovine i ponudio im priliku da kroz igru i druženje uče o evropskim vrijednostima i bogatoj kulturnoj baštini EU.



Mladi sa Zapadnog Balkana učestvovali u programu “Western Balkans Youth Team: In Youth Eyes” na 31. Sarajevo Film Festivalu



Kroz filmove, diskusije i druženje tokom **31. Sarajevo Film Festivala**, mladi iz cijelog zapadnog Balkana imali su priliku učestvovati u programu **“Western Balkans Youth Team: In Youth Eyes” Dealing with the Past**.

Sarajevo Film Festival u saradnji sa zakladom **Friedrich Ebert Stiftung** i ove godine je organizovao program “Western Balkans Youth Team: In Youth Eyes”, koji je mladima omogućio sudjelovanje na festivalu i posebnom programu posvećenom međukulturnom dijalogu, suradnji mladih i izgradnji mira. Koordinator mladih ovog programa na SFF-u bio je **Slobodan Blagovčanin**, koji je pratio i podržavao učesnike tokom cijelog trajanja festivala.

U programu su učestvovali mladi u dobi od 18 do 25 godina iz Albanije, Bosne i Hercegovine, Hrvatske, Kosova, Crne Gore,

Sjeverne Makedonije i Srbije. Oni su kroz film, timski rad, diskusije i kreiranje sadržaja za društvene mreže i medije aktivno doprinikli boljem razumijevanju i povezivanju među mladima u regiji.

Sarajevo Film Festival održan je od 15. do 22. augusta 2025. godine.




CAT – Bosna i Hercegovina

I tokom avgusta smo nastavili sa našim redovnim aktivnostima u okviru inicijative „CAT – Bosna i Hercegovina“. Naše mačke su i dalje osvajale srca javnosti na društvenim mrežama, deleći brojne meme-ove, pozive na seminare i inspirativne priče o mladima iz Bosne i Hercegovine.

Ukoliko još uvijek ne pratite naše mačke – pozivamo vas da to učinite na:

[Facebook](#), [Instagram](#) i [Youtube kanal](#).

Ja dok čekam starije generacije
da odrastu i da se prestanu
ložiti na nacionalizam i birati
poluobrazovane idiote:



Redovne aktivnosti ORC / hCa u avgustu

Tokom avgusta smo radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.orctuzla.ba). U okviru toga smo svakodnevno na mejling listu mreže (omladina@orctuzla.ba), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Isto tako, radili smo i na održavanju komunikacija i koordinacije unutar Bosanskohercegovačke Anna Lindh mreže (<https://orctuzla.ba/alfbih/>, <https://www.facebook.com/groups/httpswww.alfbih>) Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA SEPTEMBAR 2025.

- ❖ U okviru aktivnosti na projektu „Gen Z Rising“ – **Novi lideri za mir – Millennials supporting, podržanog od strane IOM Sarajevo**, nastavljamo aktivnosti. 6. i 7. Septembra crtati mural u okviru akcije „Zidovi koji spajaju“, zajedno sa poznatom muralistkinjom Marijom Tica Kovačević. U drugoj polovini septembra planiramo organizovanje ulične akcije u Tuzli. Više informacija, kao i otvoren poziv će biti objavljeni na našim info kanalima u narednom periodu.
- ❖ Nastavak rada na projektima, fundraisingu;
- ❖ Priprema projektnih prijedloga za pozive koji su u toku;



AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac



Dnevne radionice

Omladinska organizacija Svitac je nastavila sa svakodnevnom interaktivnim i online aktivnostima. Mlađi učesnici su radili kreativne i edukativne stvari prilagođene uzrastu, uz pomoć lokalnih i međunarodnih volontera. Ovaj mjesec su se bavili raznim zabavnim i kreativnim rukotvorinama. Neke od najzanimljivijih aktivnosti uključuju izradu hvatača snova, mini kanti i papirnih lubenica, različitih vrsta ptica, ljenjivaca, pa čak i šarenih čudovišta. Učesnici su zaista uživali u praktičnim aktivnostima i uvijek je lijepo vidjeti kako njihova kreativnost blista. Ovog mjeseca smo se više fokusirali na takmičarske igre, igre na otvorenom koje uključuju timove, kao i igranje edukativnih karata i izradu nakita. Grupa se također bavila vježbama ritma, probama pjesama i plesnom koreografijom. Učesnici su nastavili da uče ćirilčno pismo vežbajući pisanje slova Ђ, О, П, Р и С (Nj, O, P, R, S) i jednostavnih riječi na ćirilici. Izvodili su vježbe zagrijavanja i dječju jogu, a svakog četvrtka su plesali, učestvovali u sportskim aktivnostima i radili na održavanju fokusa i koncentracije dok su čitali i slušali priče. Na radionicama engleskog, njemačkog i turskog jezika učili su riječi koje se odnose na ljetovanje, plažu, bubamare, voće, brodove i paunove. Cilj ovih edukativnih aktivnosti je da djeca razviju maštu i da koristeći razne materijale izraze svoju kreativnost, te da razviju motoriku, pamćenje, osjećaj tolerancije i poštovanje prema drugima i usvoje lijepo ponašanje. Sve radionice su implementirane uz edukativnu vizuelnu metodu sa slikama i videom.



Uzrast 13+ je učestvovao u diskusijama/radionicama na teme: tolerancija naspram prihvatanja, sreća, kultura hrane i okolina. Na ovaj način želimo mladima pružiti siguran i neutralan prostor, u kojem mogu reći svoje mišljenje.

Na engleskim i njemačkim radionicama su radili na uvježbavanju gramatike i svakodnevne komunikacije, čitanju i prevođenju kratkih tekstova i fraza, i zanimljivim projektima.



Radionice gitare

Učesnici su radili na novim i starim tehnikama, etidama, pjesmama ili sopstvenim kompozicijama.



Radionice sambe

Grupa se fokusirala na kompozicije nastale tokom prethodne i tekuće godine, a istovremeno je značajno vrijeme posvećeno improvizaciji i razvoju novih ideja.



Muzičke radionice (mlađa grupa)

Učesnici su napredovali na novoj kompoziciji u $\frac{3}{4}$ takta, stvarajući dodatnu pauzu. Kroz ciljane vježbe, fokusirali su se na poboljšanje svojih motoričkih vještina i podsticanje efikasnog timskog rada.



Art radionice na engleskom jeziku za učesnike uzrasta 13+

Učesnici su nastavili sa izradom maketa od kartona, koje predstavljaju Svitac Omladinski centar kakav oni žele da imaju u svom gradu. Radionice se odvijaju na engleskom jeziku i, osim što nude mogućnost za usavršavanje konverzacijskih vještina, predstavljaju kreativan prostor za lično izražavanje i istraživanje umjetničkih potencijala učesnika. Kroz aktivnosti crtanja i skiciranja, učesnici razvijaju sposobnost pažljivijeg opažanja okoline, poboljšavaju fine, motoričke vještine i jačaju samopouzdanje u svom kreativnom izrazu. Ove radionice dodatno podstiču pažljivost i predstavljaju zdrav način izražavanja emocija. Radionice se održavaju svakog četvrtka od 14:30 do 16:00 sati u prostorijama Omladinskog centra.



Muzički kamp Pecka

Sedmodnevni muzički kamp održan je od 20. do 27. jula u Visitor centru Pecka u opštini Mrkonjić Grad, okupljajući 20 mladih učesnika iz Brčkog. Kamp je zamišljen kao dinamična platforma za muzičko istraživanje, kreativnost, te interkulturalnu razmjenu. Organizovan s ciljem podsticanja interkulturalnog razumijevanja i umjetničke saradnje, kamp je svakog dana nudio po dvije muzičke aktivnosti - jednu ujutro i jednu popodne. Jutarnje sesije su uključivale sve učesnike u ritmičke igre, zajedničke probe i stvaranje originalnih kompozicija, podstičući timski rad i komunikaciju kroz muziku. Popodne su učesnici radili u manjim grupama na aranžmanima i razvoju muzičkih ideja zasnovanih na sopstvenim interesima, bilo kroz komponovanje originalnih pjesama, reinterpetaciju postojećih djela ili usavršavanje jutarnjih radova. Pored muzičkih aktivnosti, kamp je uključivao različite rekreativne i kreativne sadržaje, kao što su sport, planinarenje, crtanje i večernji prikazi filmova, doprinoseći raznovrsnom i zanimljivom iskustvu. Osnovni cilj kampa bio je promocija interkulturalne razmjene i podsticanje saradnje među svim učesnicima. Učesnici su se s kampa vratili ne samo sa novim muzičkim vještinama, već i sa ojačanim prijateljstvima i dubljim razumijevanjem saradnje preko kulturnih granica.



Za septembar se planira nastavak svih aktivnosti Omladinske organizacije Svitac.

Institut za
razvoj mladih KULT4th Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org,

web: www.mladi.org

**Institut za razvoj mladih KULT proslavio Međunarodni dan mladih
nagrađivanjem najboljih aktivista u BiH!**

U Bosni i Hercegovini živi hiljade mladih ljudi koji u svakodnevnicu prepunoj izazova odlučno mijenjaju svoje zajednice. Oni ne čekaju promjene, nego ih stvaraju – bore se za ravnopravnost, štite okoliš, koriste umjetnost da pokrenu dijalog, pokreću kampanje i digitalne revolucije. Upravo njima, njihovoj hrabrosti, upornosti i viziji, posvećena je nagrada **Youth Activism Award**.

Nagrade su otišle u ruke onih koji svakodnevno dokazuju da su mladi snaga promjene. U pet kategorija, prepoznati su mladi koji kroz svoj rad i inicijative pomjeraju granice, bilo da se bore za ljudska prava, ekološku pravdu, inkluzivnije društvo, slobodu izražavanja ili digitalne transformacije koje služe zajednici. Pored toga, priliku za prijavu i nagradu imale su i organizacije koje uključuju mlade i pružaju im podršku.

U kategoriji *"Iskra promjene"* (društveni aktivizam) nagradu je osvojila **Nudžejma Karajić iz Velike Kladuše**, u kategoriji *"Zeleni borac"* (ekološki aktivizam) nagradu je osvojila **Layla Jusko iz Sarajeva**, u kategoriji *"Svjetionik pravde"* (aktivnosti za ljudska prava) nagradu je osvojila **Amina Imamović iz Sarajeva**, u kategoriji *"Iskrokreator"* (umjetnički aktivizam) nagradu je osvojila **Tesnim Karišik Spahić iz Sarajeva** te u kategoriji *"Digitalni glasnik"* (digitalni aktivizam) nagradu je osvojila **Jelena Savić iz Gradiške**. Organizacija koja je osvojila nagradu je Udruženje za brigu i opšta prava djece **"Naša djeca" Zenica**.

Youth Activism Award nije samo nagrada, nego simbol zahvalnosti i podrške mladima koji svakodnevno djeluju, mijenjaju svoje zajednice i kreiraju bolje prilike za sve nas. Ovom nagradom, Institut je odao priznanje njihovim uspjesima, šalkjući poruku da mladi zaslužuju da budu viđeni, saslušani i podržani.

U periodu koji slijedi Institut nastavlja prepoznavati mlade aktiviste i pružati podršku za njihov rad.





Narandžasta priča u Banjoj Luci: Djeca poslala poruke podrške ženama i djevojčicama

Dom za nezbrinutu djecu „Rada Vranješević“ u Banjoj Luci još jednom je bio prostor u kojem su se ispreplitale dječja mašta i svijest o važnim društvenim problemima.

Kroz učešće u kreativnoj radionici povodom obilježavanja **Narandžastog dana** – dana borbe protiv nasilja nad ženama i djevojčicama, djeca su imala priliku da kroz umjetnost i slanje poruka podrške razvijaju svoju kreativnost, ali i da na njima blizak način shvate ozbiljnost problema nasilja i značaj podrške žrtvama.

Radionicu je vodila **Mia Selenia Lerch**, polaznica devetnaeste generacije **„Uči, Misli i Djeluj!“** obuke za omladinske lidere koju provodi **Institut za razvoj mladih KULT**. Njena ideja i realizacija ove aktivnosti, uz podršku Instituta, bila je još jedan korak naprijed s ciljem kreiranja boljeg i sigurnijeg okruženja za sve nas. Radionici je prisustvovalo jedanaestoro djece školskog uzrasta. Tokom prvog dijela radionice, djeca su pisala i lijepila poruke na narandžasti pano, koji je ostao u prostorijama Doma kao simbol zajedničkog učenja i sjećanje na radionicu. Poruke su govorile o tome šta je nasilje, kako ga prepoznati i zašto nije u redu da o njemu šutimo.

U drugom dijelu radionice, djeca su crtala i pisala poruke podrške ženama i djevojčicama žrtvama nasilja. Na kraju aktivnosti, poruke i crteži pričvršćeni su za narandžaste balone i zajedno pušteni ka nebu, kao simbol nade i podrške.

Radionica je spojila učenje, kreativnost i empatiju i još jednom pokazala da se protiv nasilja borimo znanjem, otvorenim razgovorom i podrškom koju pružamo jedni drugima.





Boje budućnosti i energija mladosti na slikarskoj radionici u Jablanici

U toku održane slikarske radionice u Jablanici, mladi su imali priliku otvoreno razgovarati o temama koje se tiču njihove budućnosti, o svome gradu, porodici, prijateljima i planovima.

Radionica je održana u sklopu Festivala omladinske kulture i aktivizma (**PYAF**), u saradnji sa **OKC UrbanArt** i **Vijećem mladih općine Jablanica**. Radionicu je vodila **Amra Budim**, predsjednica Likovnog udruženja građana **“Neretva Art”**, a mladi su kroz boje i oblike izrazili svoja osjećanja, misli i dileme.

Kroz neformalne razgovore, mladi su podijelili svoja iskustva, s naglaskom na izazove koje donosi život u BiH te na razmišljanja o tome hoće li ostati u svojoj zajednici ili tražiti prilike van nje. Umjetnost je bila most koji je povezivao mlade, omogućavajući im da otvoreno govore o svojim željama i potrebama.

Ono što je svakako obilježilo ovu radionicu je energija i inspiracija koja je dolazila od mladih, koji su pokazali da, uprkos svim izazovima, imaju snažnu volju da stvaraju pozitivne promjene. Njihove priče i njihov talenat podsjetili su nas još jednom na važnost davanja prilika mladima i na to koliko je bitno biti svjestan svog potencijala, bez obzira na to gdje se nalazimo.

Radionica nije bila samo prilika za umjetničko stvaranje nego i za povezivanje sa vlastitim emocijama, željama i potrebama. Na kraju, svaka slika bila je simbol hrabrosti i odlučnosti da se, bez obzira na okolnosti, mladima stvori bolja budućnost u BiH.





Omladinski klub „DIJAMANT“

Ul. Bučići 42, 70101 Jajce

Tel./fax: +387 30 279 444, +387 61 179 209, +387 63 366 811

E-mail: m.sekib@bih.net.ba

www.ocd-dijamant.net

Jačanje aktivizma mladih – Projekat Omladinskog kluba „Dijamant“



Omladinski klub „Dijamant“ najavljuje početak realizacije projekta **„Jačanje aktivizma mladih“**, koji ima za cilj osnaživanje mladih ljudi, njihovu aktivniju uključenost u društveni život i razvoj ključnih vještina potrebnih za preuzimanje aktivne uloge u lokalnoj zajednici.

Kroz različite edukativne, praktične i aktivističke aktivnosti mladi će dobiti priliku da izraze svoje stavove, zastupaju interese svojih vršnjaka, ali i doprinesu poboljšanju kvaliteta života šire zajednice. Projekt je posebno značajan jer odgovara

na stvarne potrebe mladih u jednoj od najsiriomašnjih općina Srednjobosanskog kantona, gdje mladi, posebno oni iz ruralnih područja, često nemaju pristup sadržajima i prilikama dostupnim vršnjacima iz urbanijih sredina.

Projekt donosi mladima?

Mladi uključeni u aktivnosti dobit će priliku da razviju kompetencije iz oblasti individualnog i grupnog aktivizma, organizacije događaja, javnog nastupa, pisanja službenih dopisa, komunikacije s institucijama te kreiranja društveno-angažovanih kampanja. Na ovaj način projekt direktno doprinosi ciljevima Zakona o mladima FBiH, posebno u oblastima participacije, volontiranja i informisanja.

Planirane aktivnosti obuhvataju formiranje projektnog tima, radionice i predavanja o volontiranju i omladinskom aktivizmu, humanitarne akcije, organizaciju kulturnih i sportskih događaja, društveno-angažovane online kampanje, terenske akcije uređenja javnih prostora, kao i posjete drugim organizacijama i institucijama s ciljem razmjene iskustava. Poseban naglasak stavljen je na radionice o komunikaciji mladih sa lokalnim vlastima i medijima, čime se podstiče njihovo osnaživanje u procesima odlučivanja.



Projekt je važan?

Omladina u Jajcu i okolnim ruralnim područjima suočava se s izazovima pasivnosti i izolacije zbog nedostatka edukativnih i aktivističkih programa. Ovaj projekt nastoji razbiti barijere, motivisati mlade da prepoznaju vlastiti potencijal i osposobiti ih da postanu pokretači promjena u zajednici. Dugoročno, to znači jačanje kapaciteta udruženja, stvaranje mreža podrške te izgradnju odgovornijih i aktivnijih generacija.


Projekt je namijenjen?

Ciljna grupa su mladi od 14 do 30 godina, bez obzira na prethodno iskustvo, a posebna pažnja posvećuje se uključivanju mladih iz ruralnih sredina, onih socijalno ugroženih te onih koji do sada nisu imali dovoljno prilika za aktivno djelovanje.

Očekivani efekti uključuju povećanu motivaciju mladih da učestvuju u javnom životu, sticanje novih znanja i umrežavanje s drugim akterima u zajednici. Projekat se implementira na nivou lokalne zajednice, ali s potencijalom da posluži kao model za slične inicijative u drugim sredinama. Održivost će biti obezbijeđena kroz stečene resurse, iskustvo tima i razvijene partnerske mreže.

Projekt „Jačanje aktivizma mladih“ implementira **Omladinski klub „Dijamant“**, uz podršku **Federalnog ministarstva kulture i sporta**.

Tim za realizaciju aktivnosti.



INFORMACIJE / NAJAVE / DONATORI / POZIVI

1. Otvoren je poziv za iskazivanje interesa u okviru projekta #ŽeneVodeBiH!



Pravo apliciranja imaju ženske organizacije i ženske lokalne neprofitne organizacije koje:

- su registrovane najmanje 3 godine;
- imaju dokazano iskustvo u radu na izgradnji mira, pomirenju, sigurnosti, agendi "Žene, mir i sigurnost" i osnaživanju žena.

Info sesije za aplikante:

26. avgust 2025. u 10:00h – <https://tinyurl.com/55hfuxky>

9. septembar 2025. u 10:00h – <https://tinyurl.com/3y2w7uda>

Više informacija o pozivu <https://tinyurl.com/4hncatkn>

Prijave su otvorene do 21. septembra 2025. godine

Javni poziv je objavljen u okviru inicijative #ŽeneVodeBiH, koji se realizuje uz podršku Fonda za izgradnju mira Generalnog sekretara Ujedinjenih nacija United Nations Peacebuilding, u partnerstvu sa Ministarstvo za ljudska prava i izbjeglice BiH. Sprovodi se pod vodstvom rezidentne koordinatorice UN-a u BiH, a zajednički ga implementiraju UN Women Bosnia and Herzegovina, UNFPA Bosnia and Herzegovina i IOM Bosnia and Herzegovina.

2. Otvoren je poziv za Green agenda multiplier support program



Kroz projekat Green Agenda Navigator, Beogradska otvorena škola objavljuje otvaranje programa Green Agenda Multiplier Support Program, s ciljem jačanja saradnje, razumijevanja i uticaja organizacija civilnog društva u sprovođenju Zelene agende za Zapadni Balkan.

Ukoliko ste organizacija civilnog društva ili mreža OCD-a registrovana i aktivna u Albaniji, Bosni i Hercegovini, Crnoj Gori,

Kosovu*, Sjevernoj Makedoniji ili Srbiji – ovaj poziv je namijenjen upravo vama!

Tematske oblasti poziva uključuju:

- dekarbonizaciju,
- smanjenje zagađenja,
- očuvanje biodiverziteta.

Rok za prijavu: 17. septembar 2025.

Više informacija o pozivu dostupno je na sljedećem linku: [JAVNI POZIV](#)

Poziv se realizuje u okviru projekta Green Agenda Navigator, koji sprovodi Beogradska otvorena škola uz podršku regionalnih partnera: Aarhus centar (Bosna i Hercegovina), Eco-team (Crna Gora), EcoZ (Kosovo*), Eko-svest (Sjeverna Makedonija), Protection and Preservation of Natural Environment in Albania (Albanija) i CEE Bankwatch Network.

Više informacija [ovdje](#)

3. Stipendije BUM-a za srednjoškolce i studente: 100 i 150 KM mjesečno

Biznis unija menadžera raspisala je konkurs za stipendije srednjoškolcima i studentima u BiH za akademsku 2025/2026. godinu. Stipendije iznose 100 KM mjesečno za srednjoškolce i 150 KM za studente.

Biznis unija menadžera (BUM) je bosanskohercegovačko udruženje koje povezuje vodeće menadžere s ciljem razmjene najboljih poslovnih praksi i unapređenja poslovnog ambijenta u zemlji. Udruženje potiče

poduzetničku kulturu, etičko poslovanje i jačanje gospodarstva kroz znanje i iskustvo svojih članova.

Pravo prijave na stipendiju imaju studenti i srednjoškolci koji imaju prebivalište i pohađaju obrazovne institucije u Bosni i Hercegovini. Kandidati moraju imati status redovnog ili redovnog samofinansirajućeg studenta, odnosno srednjoškola, upisani prvi put na jednu od godina studija I ili II ciklusa.

U prijavi je obavezno priložiti uvjerenje o prebivalištu ne starije od godinu dana, uvjerenje o statusu redovnog studenta ili srednjoškola (alternativno kopija indeksa sa ocjenama), te dokument o prosjeku ocjena. Uz to, moguće je priložiti i dodatnu dokumentaciju koja donosi više bodova, kao što su ovjerena izjava o domaćinstvu, dokaz o primanjima domaćinstva, potvrde o volontiranju, priznanja s takmičenja, dokaz o poznavanju stranog jezika i slično. Ovo nije eliminatorno, ali doprinosi uspjehu u selekciji.

Posebni kriteriji koji se dodatno boduju obuhvataju status u hraniteljskim porodicama, korisnike ustanova za djecu bez roditeljskog staranja, dokaz o životu u iznajmljenom prostoru, školovanje ostalih članova domaćinstva te hronična oboljenja članova porodice.

Stipendije se dodjeljuju za period od 10 mjeseci i iznose 100 KM mjesečno za srednjoškolce i 150 KM mjesečno za studente, a isplaćuju se u mjesečnim ratama tokom akademske 2025/2026. godine.

Odluku o dodjeli stipendija donosi posebno formirana komisija, koja zadržava pravo provjere tačnosti dostavljenih podataka. Samo kandidati koji uđu u užu izbor bit će kontaktirani i pozvani na kratki online intervju. Odabrani stipendisti obavezni su volontirati 15 dana u jednoj od sekcija BUM-a, poput administracije, marketinga, projekata ili edukacije.

Prijave se dostavljaju isključivo putem [online formulara](#). Sva prateća dokumentacija mora biti objedinjena u jedan PDF dokument pod nazivom "Ime_Prezime_Prijava_na_Javni_poziv".

Rok za dostavljanje prijave je 15.09.2025. do 23:59. Nepotpune i neblagovremene prijave neće biti razmatrane. BUM zadržava pravo da od odabranih kandidata zatraži original dokumentacije.



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba

Mjesečni bilten uređuje Omladinski resursni centar - ORC Tuzla

Urednica Biltena:
Asja Šerifović, kolektiv

Prevod Biltena na
engleski: Asja Šerifović

WEB stranica Mreže:
www.orctuzla.ba

Mejling lista Mreže:
omladina@orctuzla.ba

Webmaster:
anicic.dev@gmail.com

ISSN (BHS Varijanta): **2831 – 0845**

ISSN (Engleski): **2831 0853**